

摘藻堂四庫全書薈要

集部

欽定四庫全書薈要

集部

誠齋集卷一百九

十九

詳校官助教臣謝登雋



欽定四庫全書薈要卷一萬五千六百八十六

集部

誠齋集卷一百九

宋 楊萬里 撰

尺牘

謝俞漕舉南昌大兒陞陟

某近十三日燈下大喜走筆以致命名之賀當已上達
適得大兒書報仰蒙台慈矜惻寒士特賜剡奏舉以陞
陟劉安登仙雞犬隨之而上天狄公為相桃李皆出於

其門方當知己大用之初首在筆端膚寸之下此舉殊
絕一路聳觀仰惟異思盡室懷感喋喋何足以謝少見
萬分之一耳

答新澧倅胡判院

某伏以即辰春夏之交暄涼之雜恭惟季解府判判院
鄉丈浮家赴鎮前茅追萼片雲催詩川后靜波天相台
候動止萬福某恭審上稗圭水衡都內之印寫定國竹
西烏絲之幅洞庭木葉澧浦玉佩寂寥千載復得今代

之屈宋衣天孫之錦裳提詩人之椽筆以主斯文之夏
盟何其盛也沅芷澧蘭端可賀矣幼輿如天之福遂得
走趨服事於清塵之下風訓之以澹菴續弦之膠庀之
以仲尼上律之天不於門下而望更於誰而望也慶牋
未往墨妙先之抒謝無多語上言加餐飯下言長相思
無疾其驅天子有詔某惶恐再拜敬問金玉之堂芝蘭
之庭即日恭惟尊尊幼幼受祉山則某老病不中使今
然取履結襪尚堪承命兒曹皆辱榮問至感

答本路張提舉

某伏以即辰春夏之交寒燠挑戰恭惟提舉郎中綉衣
立漢玉節倚天秋霜百城春雨萬物三神隕社台候動
止萬福某納祿為氓遠跡荒陲二天覆幬四體不勤此
賜誰出可護其感拂日之旆曷月行部當與山農披獨
速戴夫須九頓首於星輅之清塵將令者還奏記抒謝
願言迺玉厥躬以柱吾道即從上雍云

某惶恐再拜晉越敬問潭府之居德星之聚即日恭惟

尊尊幼幼善祥山則純嘏川增其臥痾餘生固不足備
牛馬走或者執晏子之鞭取黃石之履猶足代匱不一
某惶恐再拜賜書之寵光輒致舐犢之賤懇大兒長孺
過不自量其不才冒昧學製南昌之巖邑行且一考適
有天幸乃獲走趨服事於使星之末光敢望台慈憐之
以仲尼上律之天庇之以子美萬間之厦俾得展尺寸
以竭其力竊丰升以活其孳訓迪其不逮而全度之有
終不勝寒士祈恩望賜之至

答成州李知府

某伏以即辰春夏之交寒暄之雜恭惟判府太中鄉丈
身作長城隱若敵國邊圉大競天人具依台候動止萬
福某齋莊奏記以謝先辱未見願言貴珍大業即還禁
近某辭奉玉立十五其霜蜀月楚星萬里同晷一封雲
錦西風吹來披讀三周驩慰亡量恭承命戒委以先太
中掩幽之刻老病學落其曷敢當司馬大夫之簡介弟
得得遠臨以兄之命下走辭之可乎抑文債如山撥之

不開願小紓期會儻擬作章就當得敬注惟原省焉

與本路運使權大卿

某伏以即辰首夏清和南風薰阜恭惟都運徽猷大卿
尊契丈外臺倚天使華拂日春雨萬物秋霜百城三神
儲祥台候動止萬福某自顧黃冠整服之微仰瞻繡衣
霄漢之貴楚星蜀月各天一方雖欲寄牋書成無雁今
焉東歸乃獲奏記何喜如之未見君子願言珍重即登
甘泉法從之綴

某恭審膺受璽書肅將冰漕錦江玉壘回岷峨曉日之
旗雲棟雨簾煥桑梓晝衣之繡過家適止即拜榮如恭
惟都運徽猷大卿嗣中興佐命之英為昭代典刑之老
郎星卿月徧春風玉筍之班使傳仙槎犯北斗銀河之
浪乃底可績式邁其歸即陪紫禁之鶯花密綴彤庭之
筆索某十年不見千里相思獨有二天晚託故人之覆
燾憑將尺素小攄慶語之慇懃仰惟台察

某惶恐再拜敬問台闕玉婍即日恭惟尊尊幼幼受祉

川增某惶恐再懇大兒長孺不量愚駢試邑南昌遂獲
密依使星之末光俯充臺治之下走敢望御以柔轡寬
其疲駑憐之以仲尼上律之天庇之以子美萬間之厦
俾得効尺寸以展其力竊斗升以活其孥始終保全不
勝寒士幸願

答隆興府王倅

某伏以即辰震始將夏暄涼方戰恭惟府判太中同寅
帥閩分月湖山天迪仁賢台候動止萬福某敬澣濯衣

冠上記連教仰謝于相先伏惟原省

某山林莖夫分犢草眠鷗沙影響不達於市朝姓名不
至於通貴顧獨聞督府之貳有君子焉盛名與五緯爭
光雅意與三江同流而未得一識私竊恨之敢謂達官
貴人乃折節以下草莖雲錦一封自天而落意氣燠休
勞苦勛愉又投贈之以先正木杪龜趺之碑盥手漱口
三讀九嘆仰覲前輩立朝伏蒲之大節卓詭切至之忠
言僕雖老矣猶得師也何福如焉抒謝之心尚孩萬於

此紙上之云云者喙訥於心筆又訥於喙爾

某惶恐九頓首以敬問盧家白玉之堂楚天綠荷之屋
德星之聚飛仙之媵即日恭惟尊尊幼幼受祉山則某
老病無能為役然豈無取履結襪之可執者傾耳以竢
也某惶恐有懇大兒長孺適有天幸乃得充下走於大
府託蔭映於慶雲教載之全度舍魯何適焉

答周監丞

某伏以即辰老紅驅春衆綠生夏恭惟致政提舉監丞

尊契丈台座老子之龍籛弄明月仲尼之鳳頡頏飛霞

堪輿篤棊川嶽盡護台候動止萬福爰登金玉之堂芝

蘭之庭安期羨門之集受祉山則某一生強項小信機

祥而疇昔夜者玉蟲作花如太華之蓮吻爽清旭乾鵲

饒舌如魏人之譟家人子輩咸曰是必有異僕固盧胡

而心誹之也言未既而韋公五朶之雲謫仙一封之錦

自天而落矣隻梁雙槁莫非寸裁金而雙菽璐也意者

乘成先生撐腸以東壁西崑之藏滌筆於冰甌雪椀之

泓而然耶不然何其一字不似人間來也若其期汗漫
於九垓之上御風往反或命中車於青原之雲或掉孤
舟於白沙之煙其出也道乎前者維有白鷗和其哦者
維有黃鸝僕亦不得而追也其歸也夾其輶者維有荷
芰候於門者維有楊柳僕亦不得而隨也其人亦不得
而追隨則其書顧不可襲而寶乎昔歲冬年之約蓋出
於仲尼相君不敢以聞耳僕焉敢作意起事乎且此世
俗之苛禮也非吾人之內心也尺素勞苦固所願得而

望賜者所約豈為吾輩之情話恩書也哉鳳毛仇香似
聞捧檄覲省即有膝上文度之喜可羨可妬某三雛偕
出而王陳二倩夫婦皆挾扶床坐膝者來歸相伴甘受
其聒不落莫也辱多問故及願言永綏眉壽聖主三
王乞言之益七十二鑽勿厭勿倦勿靳

答提舉雷郎中

某伏以即辰離治肇修清暑云穉恭惟提舉郎中尊契
文身兼三官名齊十賢遠毗如畿鯨波如砥自天祐之

神介聽之台候動止萬福某來日無多前途就窄羅雀
之門亦無雀可羅矣軍將打門蓬首出問乃吾天上故
人飛墮雲錦之書訪問生死之語詞溫如春意厚如親
至於清酒百壺花羅八兩東坡江瑤之品蔚宗寶熏之
妙紛委甲至殆將塞破堊人茅棟矣酒錢與鄭衣著遺
白數百年無此事矣古風蕭蕭公獨追還士俗所闕與
時高下豈細也哉顧老病之人無以堪之耳言之多多
亦祇以贅頗聞么麼小蠢隨即殄殲頗勤指縱否大兒

數來迎侍張帥亦一遣泛宅初欲一往竟未能也東湖
西山招王勃喚山谷尚不要徐洪那要病翁耶荷荷未
見願言珍重即還難翹豹尾之間以昌斯文

答彭澤王縣尉

某恭承千里寄聲示誨文編讀至潛玉述宣子誄詞氣
沛然如銀河倒挂孰能禦之進而未憚老夫當避路矣
王亞夫有子可賀也已二境詩呈似一笑

答黃宰

某蒙命戒新學記書丹夫以賢令君之盛舉鄉丞相之
古文而某乃得挂名經端縱不我命猶將求旃矧有命
乎示及方目卷子即當落筆

與江陵范侍郎

某伏以即辰離治厥初清暑猶穉恭惟判府安撫閣學
侍郎尊契丈臥護北門身作長城威惠交加天人咸若
台候動止萬福某老病日侵僵臥待盡眇然未有參拜
之期不勝大願願言式玉厥躬以棟吾道即間兩社均

宏四海其一昨台座持祥刑之節於湘江某服輓輅之
役於建業大兒長孺每得從載後車於淡巖浯溪之上
是時嘗一奏記未幾相如諭蜀畫繡錦里而楚人則解
組懸車歸畊巖石之下楚星已月相望萬里公之便了
我之奉一皆隔其蹟矣然雪山倚空而照人伶俜之影
無一日不在光映之中也契丈正學懿文何必減當家
之玉堂鳳池孤忠壯節何必減宗人之文正忠宣人物
無不及而名位有未稱僕寧勿言言之生癭姑置姑置

每懷館中之樂公之珠乘自史院而東出僕之柴車自
提舉廳而西入相顧交揖竚立小語今如在天上而况
賞梅石渠登高風篁也乎僕亦勿言言之斷腸

某惶恐再拜進越敬問台座自揚徂荆浮家移鎮嫂氏
淑人一行尊穉能勿勞動即日恭惟蒙福山則今似直
閣今幾人先是未塗柴麝之時每動乃翁之念今有子
萬事足矣老妻兒女列拜起居有廬陵委否某惶恐賤
懇第三男幼輿不量穉駭初習為吏充員澧州慈利縣

監稅故人作尹眼為青之句願賦山谷是詩也又有至
懇長孺之妻兄承直郎澧州推官吳璪文詞炳蔚才識
敏明廉已仁民足周世用某淳熙己酉假守筠陽之日
渠為戶掾極賴其助是時未作親也首以京狀薦之今
又有余丞相顧守二章矣唐憲亦許以職司之章舉之
獨合尖未有畔舉敢告契丈帥司特輟今年下半年一
京削以成就之不啻某受此龐鴻之恩至懇至禱

答湖北唐憲

某奏記節下三致一志焉伏勤誨答訪問生死情文綯
練榮感萬斯幼輿初習為吏便蒙天上故人招為入幕
之賓脫之潢汙轉之清波使某與老妻聞之感激不寐
也吳推文字極費區處死罪蒙許來歲京削至感至感
聞家塾一新義學多士朋來敬往一古詩以詠歌盛事
惟一笑而棄置之

與澧州趙守

某惶恐敬致賤懇推官吳承直璪大兒之妻兄也文詞

炳蔚才識敏明廉已勤民足優世用某淳熙己酉假守
筠陽渠為戶掾極得其助是時尚未作親也首以京削
薦之今又有余丞相顧守二章唐憲亦許以職司之章
所大缺者合尖之舉也適有天幸乃獲趨事戟纛之末
光敢望台慈特輟上半年一京削以成就之似聞幕下
賓贊多初官未用得文字計亦無爭者惟台座一灑薦
墨則五章之恩併歸門下不然則九仞虧一簣矣其利
害輕重大小仁人必動心焉

答吳節推

蒙諭趙澧州書今上納如看訖却緘蠟而投之范帥亦
有一書幼輿託庇并求尊親京削令幼輿錄呈也唐憲
回書封去某又再懇之矣陳漕無半面不曾通書亦不
曾作幼輿託庇之書彼此無情分豈可干求談何容易
不惜取辱但無益耳餉脯醢果實至感

答吉州趙倅

某恭聞總司盡蠲糶事此益通守仁賢深軫民瘼誠心

所格金石為動某何力之有重勤謝幅何敢當也敘報
不莊惶恐惶恐

答江東耿運使

某伏以即辰祝融仲月昌歆佳辰恭惟都運大監殿撰
尊契丈玉節拂天冰漕流地百吏秋廩一路春生高厚
給扶台候動止萬福某老病日侵少安田里皆天上故
人五緯之芒九河之潤所照映而滲漉者敢忘所元未
遑參拜願言保合太和對揚休命即侍甘泉用光吾道

某頃者台座自陝以東召公主之適小兒入京因之奏
記仰勤報教玆然餘生介在邛落如坐井底乃不知有
謖堂之戚不獲脩生芻之弔今奉尺素赴告乃始聞焉
欲唁則後矣所謂既除喪而後越人來弔者耶死罪死
罪台座經世之材冠出漢庭諸老之右郎星卿月使節
州麾顯庸加績簡在上心久矣寄徑簪索運掌鈞樞端
不作難此海內所仰目也五年之間再臨舊部孰不有
下喬木之歎又一式適可倚而竢

某挂冠林下死灰不燃朽株不芽過者掉臂而契丈不
遠千里詒書寄聲訪其生死此事今無古或聞也抒謝
之詞萬此寧有足耶

某惶恐再拜敬問契家台媿即日恭惟尊穉蒙福餉以
天花摩姑鰓魚鯿線海錯宣筆下拜珍感之至大兒長
孺荷合尖之大恩得僥改秩之官南昌行且一考次公
幼輿為衡澧稅官亦皆之官矣併辱下問尤感尤感

答韓總領郎中

某伏以卽辰五弦解慍八能奏音恭惟奉使總領郎中
尊契文上應列宿外饗師干天人是孚河嶽盡護台候
動止萬福某老病日侵未先朝露微我天上知己憐以
慶雲之惠何以逮此未占叅拜願言導迎叶氣裊對龍
光卽第從臣之嘉頌

某恭審對越紫泥騫於粉署氣衝星象虹貫依烏之躔
饒給貔貅輻輳汎舟之役恭惟驩慶某屬者奏記控於
司聽以鄉邦疇昔之小饑祈臺府蠲除於糴事大恩芻

言之僭自投繡斧之誅敢意宣慈未忘舊部應之如響
報以好音暖然似春沛以潤澤免符既下闔境驩呼顧
病夫欲謝而未能忽行李鼎來而繼好一封雲錦訪問
死生千花越羅衣被寒苦侑以肴核固非珍芳鮪勝絕
於漸臺鯨宛同於周雅紅曬如瓜之棗霜清大谷之梨
旅百于前有萬其寵徒知九頓首而坐書不盡言安得
一交臂而談愛而不見仰惟丈席下燭寸心幸甚

某惶恐再拜借問金堂玉室之閤安期羨門之媿即日

恭惟亟蒙祉福尊稱惟鈞某病身無可用然取履結鞵
尚堪為役

答鄒校書

某伏以即日五絃解慍八能應律恭惟校書校理秘文
依光東壁天棊忠賢台候動止萬福某老病日侵前途
就窄未先朝露蔭映所逮敢忘歸倚侍見眇然願言愛
此大業對越休命十年鳳沼某也尚竊遲之某深山壑
人雉兔之與處魚鼈之與渚幽屏寂寂姓名不入脩門

書問不至朝貴曾為一代名勝以卓詭切至之言而當
聖心以博習脩潔之儒而表冊府乃於霄漢之上墮雲
錦之書以辱收之不以其耄老而加斯須之敬乎惟名
高而詞之卑德盛而心之不足此古聖賢進德無底之
壑也顧肯與鄉里小兒校科級而競名爵也耶趙載道
所委記亭子之文某也淺之為丈夫矣以是媿執事

答彭憲

某伏以五弦解愠八能應律即日恭惟提刑直閣郎中

尊契丈霜臺拂日玉節倚天一路春生百吏秋肅天棊
忠賢台候動止萬福某來日無多未先朝露者不曰仲
尼上律之天覆憐而生殖之手一寢一飯敢忘所元舊
因疾趨肅容過闕折屐損一將指疇昔夜痛呻吟呼天
起視東牕殊不肖白清曉命瘦藤跣而出忽有軍將打
門童子走報天上知己詒我一封雲錦之書尉存酸寒
訪問生死發而占之再拜三讀不覺失痛楚之所在檄
愈頭風僕始不信乃今知之此惠已不勝其渥矣而又

申之以名酒佳實之餉縹玉芳冽金漿澄清先薦屏攝
而後敢洗琖開嘗漢之蘭生隋之玉薤程鄉之若下沙
落之醪邨風味勝絕所謂有過成莊無不及焉至於來
禽山風滿把月露昭洗色香味尚帶林下氣韻也一杯
徑醉深入無功之鄉親睹伯倫之德天高地下之不知
而何樂正子春之疾之知哉感哉意氣孩兆未多也鄉
邦自入夏五風十雨未足以喻今歲大底三日而霖霖
五日而滂沱不冒田疇不漂室廬食新之望在浹日間

耳微祥刑使者平反空囹之仁感召嘉氣曷濟登茲退
之云胡不均宏俾執事樞山谷云三十餘年霖雨手淹
留在外作時豐古今同此歎也侍見未有前期不勝大
願願言愛此大業對越休命細札除書旦晝以須

答蜀帥劉尚書

某伏以即辰六月徂暑南風之薰恭惟判府制置龍學
尚書尊契丈臥護天西名震闕外忠勤昭格高厚給扶
台候動止萬福某病與老期前途就窄覆露所逮未先

狗馬填溝壑耳餘無足為知己道者楚星蜀月萬里相望何從得一瞻玉山滿聽韶鈞願言愛此盛德大業作我明堂一柱即補虛左之席

某日嘗奏記西征前茅之隸上林之鴈石頭之函香如也第覺風來雪山水下豔瀕帶仁聲而挾威譽日夜與之俱東允答平生期望於一世盛名之下者甚欣甚賀廝赤三輩清曉剝啄柴扉驚起猿鶴之夢真謫仙所謂手把一封書如天落雲錦也送似書冊之富侑以藥物

之珍降拜萬感某頃在金陵京文是時帥蜀以通鑑唐書為寄至於太平御覽之書疇昔聞名何嘗夢見此惠尤不貲也方當問龍乞水洗開病眼睛窻棊几時展一編便如見諫議面也小詩抒謝見於別牋惟一覽而投之苦海耳

某惶恐再拜進越敬問金堂王室之闕安期羨門之媿即日恭惟尊尊幼幼蒙福山則諸郎學士直閣俱未嘗展連教之謁仕學之優衣鉢之付無然歆羨之詩某所

以願賦也大兒獲倚通德之門巢萬間之厦風雨不動如山矣中男皆已之官極感多問如陳開州雖不及一受此鞭竟蒙約王茶馬同上襴墨不翅其受此厖鴻也羅普州荷寄支積奉即送其子渠自有謝緘今付來騎呈似京文當國天下之士受陰賜多矣當時未必知也今乃知之矣而九京不可作矣煎膠續絃不在門下而馬在乎惟毋忽

答本路張帥

某伏以即日六月徂暑南風之薰恭惟判府安撫閣學
尚書契丈以北斗喉舌之淵曜鎮南紀波瀾之上流令
修戶庭民安田里天人咸若第祿鼎來台候動止萬福
某視蔭及夕未先朝露慶雲在上敢忘所元願言愛此
大業對越休命虛左之席舍我其誰

某深山墊人誠不自意天上知己遣紅塵之一騎墮雲
錦之尺書寸金雙玉之詞秋月華星之字訪問生死慰
存酸寒此恩不貲矣而蘭生玉薤飲以公瑾之醇德雲

腴雪乳濯以玉川之清風魚麗于留之鯨赤鯉有神之
鰓又屬饜其口腹而燕及其室家至於念炎官火繖之
蘊隆則揮之以安石之蒲葵憐明窓棊几之寂寥則富
之以剡藤之玉板窮兒暴富真成塞破茅棟矣恩意隆
重何以堪之降拜感慚惟誦淵明冥報以相詒之詩以
謝姦兆之一二而已載惟老病之身未死之間有願未
伸剩欲駿奔府廷望見瓊樹而嵇康之懶不翅七者之
不堪李陵之億亦復屢鼓而不起情與願違豈非天哉

然先生解榻之意非有胸無心者其誰不懷終當一往
以讎千里命駕之債僕之業在載馳卒章之二言矣某
既濯冠盥手發書占之矣則又有文書一函啟滕未既
而珠璣盈把霜雪回光奪目聳神應接不暇蓋于湖先
生之手澤也篤素先生有命命以挂名左方夫豈不榮
然以模母譽南威以拙工讚玉爾借不自忸其若旁觀
明眸者何勉署數語竟不能竒塞先生長者之命而已
戒及願菴詩集序引併奉教頃者天幸乃獲瞻拜凌煙

之冠劍借哦四字視呂化光二十四頌東坡德威之詩
彼將僕命我矣重勤齒及震兢以之

某惶恐再拜進越敬問台閔玉嫿即日恭惟尊穉蒙福
山村有委細大唯命長孺愚駭不肖仰戴仲尼上律之
天密窠子美突兀之屋今知免矣闔族感恩庸有既乎
更祈終惠不勝大願

答廣西張經略

某伏以六月徂暑南風之薰恭惟判府經略敷文左史

舍人契丈以五侯九伯之帥撫百粵羣蠻之封威德兩
崇華裔交慶三神盡護台候動止萬福某老病日侵荆
扉晝閑不逢東西行者之便無從奏記以為建牙開府
之賀而羅今之歸首奉一封之雲錦訪問生死慰存寂
寥溫詞勗愉厚意篤密所謂故人情誼晚誰似令我手
脚輕欲漩也台諭以謂蠻俗本自易於鎮拊非漁小利
者激其變則徼竒功者促其變可謂洞見西事之根撥
矣嘗愛亡友張欽夫帥八桂日有勸農之詩曰國之大

法有暉其垂蓋欲爾驚非欲爾施爾或自麗予疚予恫
安得予心達乎爾衷此真臨人而有父母之心者也此
意與契文章貢謝表異詞而同指端可相為表裏矣惟
契文但辨此心何病蠻俗之不懷事功之不集哉甚賀
甚賀羅令具道契文知遇訓誨之意居諸邑之右甚願
展布四體罄竭尺寸允答恩地古人之為知己者死死
尚可而况為之用且求自見於斯世哉破白京削之諾
極知踐言必不侵為者亦遵紙尾赫蹠之囑不敢漏師

于多魚也一笑衡陽兒子次公昔嘗參拜再見荷未忘
牖間之半面且屬齒牙之借譽老懷榮感簡簿老儒尤
蒙青眼寒士之光也益公事出非意初欲一出謁之緣
每一見必來山間報謁不欲勤之第以一行之書問勞
之而已荷問及某與益公同感厚意也未見願言愛重
盛德大業即還甘泉之著遂膺鈞樞之拜台媿尊稱即
日受祉惟鈞有委不鄙夸之乃幸

與湖北陳提舉

某伏以即辰季夏之月南風之薰恭惟提舉寺正玉節倚天使華拂日登攬有倣風稜肅如三神所釐台候動止萬福某吉蠲泓穎奏記連教未占叅拜不勝大願願言愛重大業對揚休命即還第頌之綴

某頃在千官雲片之末行因得盡交四海之名勝而泉山為最名相如梁公則知己之深者詩人如傅安道則投分之厚者是時已聞執事其德似太丘其文似子昂其詩似後山至於領部內則有穉圭之令聞贊廷尉則

有于公之陰德典名藩則有次公之治行其所立皆卓
然如太嶽之玉立煥然若斗柄之天垂也而僕也獨與
執事出處不齊也如相避然寸心欲然至今遺恨今乃
欲以尺紙之敬抒中情之勤以納交於英蕩之末光前
無契好後無介紹或者以為驟一則墊人一則顯仕或
者以為僭焉抑聞孔文舉與李元禮初無一日雅而文
舉遠引仲尼伯陽之交以為世契元禮然之吾家德祖
與公家孔璋同為子建之賓客非世契乎豈曰驟之云

乎張文潛與公家後山初不相識而以一書定交所謂
朝陽之光在納久矣者其書云耳則僕之尺紙豈曰僭
之云乎太史公曰可為知者道難為俗人言也

某惶恐再拜僭越敬問金堂王室之闕安期羨門之媿
即日恭惟尊尊幼幼受祉山則某老矣無能為役然尚
堪取履結韉也遲速惟命某惶恐致敬先生長者之初
不應便有請謁亦惟曠度盛德是恃小男承務郎澧州
慈利監稅幼輿筮仕之初愚駭無似適有天幸乃獲趨

事外臺之下風敢望憐之以仲尼上律之天庇之以子
美突兀之屋俾得竊丰升以活其孳效尺寸以展其力
終始保全免於罪戾不勝寒士少隸之福

答張主簿

某恭承誨帖既以高廟日厯全書某蓋嘗充員吏史官
載筆一人之數然無力抄傳今忽拜賜喚醒史館之昨
夢驚喜其可言哉第先使君行狀非如皇甫持正之文
一字惠一縑者乃蒙潤筆之禮如許不貲何如其感又

何如其忤也推謝不莊不勝主臣先使君尺牘敬跋數語歸諸插架云

答郭敬叔教授

某伏奉劄翰諭以今子試藝恩數伏惟驪慶第五法小
靳未稱所挾然父子世方園動靜之科允曰吾鄉衣冠
之盛事矣大年之父全叔之子猶將弱焉如某諸子若
孫之罷駕皆豎幡而降自崖而反矣政使累月答之亦
何益也不勝其羨又不勝其妬耳一笑契丈附此致賀

云陳丈書信已領

與余直閣

某伏以即日秋暑小却新涼入郊恭惟恩館大孝宮使
直閣驟嬰陟岵之戚偏奉樹護之養天棊純孝孝履支
持萬福某敬上記連教伏惟財幸

某屬者先丞相肯綮就國奏記辱報竊知申甫蕃宣之
喜夔龍強健之身謂壽考百年未艾也近旬浹間遽傳
赴告堯逝聞問哀痛一慟欲絕仰惟先丞相宿德尊於

四朝元勳冠於一代皇上為之震悼朝整固不相弔直
閣孝誠至性驟失所天何以堪之然不形毀瘠者聖人
之大戒樹立門戶者人子之大孝敢請強歡淖糜稍進
溢米漢之玄成唐之德裕與本朝之呂晦叔范堯夫世
襲台鼎趾美名德此某所望於直閣者孺泣難繼哀不
勝喪豈某所望於直閣某老病不克駿奔會哭於終幕
之前敬遣女壻陳丞徑代某一行不腆奠儀列之香狀
祭文矣敢冀台察

某惶恐進越再拜敬問北堂國太夫人即日恭惟哀疚
方新懿候萬福老妻敬致起居慰唁之悃恩闕台捲長
稚均祉諸令弟直閣附此弔問有委不外

與范侍郎

某異時遙羣玉之山侶振鷺之渚不自知其為天下之
至樂也老病棄官居閒處獨每一興懷並游英俊之日
欲再覲其末光餘韻何可得哉至於蘭薰雪瑩玉粹金
昭可愛可親可師可敬惟吾范文丈一人而已雨來升奠

後雪戒致齋前之句恍若玃瓊有如種玉之牋至今口
誦心藏而不能忘也荊州楚蜀之衝有古英雄之遺烈
迨暇登臨當塞破錦囊奚恨不得上下巖壑迨逐雲月
棄官事而從其後也屬者建牙之初過不自量其一寒
之墊夫乃敢奏記於十連之大帥未審或取而一覽未
忘握手論文之雅乎抑一擲而棄之云我方有公事子
姑去乎公尚忘我天下誰記我者一笑某不勝主臣敬
游致其懇大兒長孺有妻兄澧州推官吳承直環建炎

尚書表臣之孫隆興監丞松年之子也文詞炳蔚才識
敏明廉已仁民足周世用近嘗進越薦之門下收之允
足為桃李之嘉種今幸有舉者四員秩滿近在歲杪行
百里而半九十山九仞而虧一簣仰惟仁人能不動心
敢望台慈特輟今歲下半年一京削以合浮屠之尖此
恩不貲溟渤非深嵩岱非重也倘辱沛筆端之膚寸導
畎澮於章奏豈惟吳君如天之福抑亦其實並受之再
瀆之辜無所逃遁皇恐皇恐

誠齋集卷一百九

欽定四庫全書會要卷一萬五千六百八十七

集部

誠齋集卷一百十

宋 楊萬里 撰

尺牘

答虞侍郎

某伏以即日凜秋暑退新涼入郊恭惟侍郎左史舍人
國史尊契丈玉立甘泉天棊忠蓋台候動止萬福某老
病衰伏已迫夕曛摧墮餘生未先朝露天上故人憐我

蒙我之惠也念念欲致一字之敬多問網憑極知叔孫
草儀為時綿絕正當橋山事嚴之秋既而季孫奉使為
國光輝又有漢節星馳之役蹉跎至此竟蒙雲錦之書
先墮柴荆之下情誼至到詞氣劬愉至於毛穎所不能
盡之精微又託蘇君口以傳授其懇款古之交也將別
而悲後之交也既別而不思今執事之於墊人一別之
後無歲不存問無書不慇懃在外既不踈居中彌不踈
也豈墊人有可思蓋執事自作古人事而見思墊人也

祇荷祇荷魯僖之詩不云乎萬有千歲眉壽無有害少
陵之詩不云乎雲霄今已逼台衮更誰親敬賦二詩以
仰祝焉伏惟財幸

某惶恐再拜進越敬問金堂玉室之宅安期羨門之媿
即日恭惟尊尊幼幼受祉山則某老矣無能為役若曰
取履結襪尚堪指縱也長者諷吉陸賈徧觀諸子南昌
大兒去之尺有咫尚未能作意一往矧其餘乎退之云
東西南北皆欲往千山隔兮萬山阻一笑然中男次公

秩滿將來歸矣

某薦蒙別紙鐫諭斐然之文欲求當代名流善書者書之以入石敬聞命矣抑非元次山之頌莫稱魯公之妙畫非六一先生之記莫稱東園之竒字某也何人乃承此寵悚反悚反

答周丞相

某昨委材翁攜擬試詩賦呈似不敢奏記蓋恐仰而塵玉字之報今反拜賜華袞之褒榮恩文如也六王畢日

五色本是丞相擢桂之長技某本以墨義進而敷安石
之洛詠焉其廣額半眉舞袖琅當手足俱見矣昔半山
老人公讌觀優未嘗解顏而一日偶對之不覺一粲或
以問公公曰吾久思咸恒二卦不得其義適得之而喜
耳某或者獻笑而適遭其喜乎抒謝不莊仰惟原亮

答澧州趙知府

某屬者寄箋不量老朽退休之人進越以親戚吳推薦
仰于中二千石親民任使之京削挾今之請行於今之

俗是犯二不韙焉觀勢涼燠者今俗其不然乎大兒長孺嘗得京丞相而作親札薦於胡總不異勢之燠者莫相君若也而尚不功以其非言路非執法之書也然則燠中差諉而不能炮烙我者亦不能動悟也况某退休冰氏之人乎此其犯不韙一也昔祁大夫舉其子君子不以為私近呂文穆公舉其猶子文靖至謂有宰相才當時聞者不以為欺至於齊暉則有司以其為宰相映之弟而不敢取焉某何人薦其戚黨於執事其不曰私

且欺乎此其犯不韙二也今幸執事度越一世之拘攣
追還千古之竒偉得其書躍如也舉其人沛如也又且
報之曰來書之品題人物一言一字無非真實語矣退
之云大夫不疑人欺已僕何足道哉微執事孰可以當
退之之所云者乎多言何足以謝大恩之萬分獨以居
今之俗行古之道為執事賀也

答福州帥張子儀尚書

某屬者奏記仰干筆端之膏潤牒試王親茲辱報教聽

請竊聞熱官要人求者不少皆施施距之獨曲徇一故
交墊人之求薦舉不以勢而奪交游不以寒而棄萬物
皆流金石獨止孟子所謂豪傑之士不在門下其將焉
在寸心感服有量數疇昔呼偷兒之簡遂玷鐫鏡送似
墨本覽之汗如水漿可以為縱筆浪言者之戒矣傳聞
三山公帑有唐文粹大字板本嘗求一編以遮老眼未
拜賜何也得寄王應衍秀才許無沈浮耳

與權運使

某惶恐敬致迫切之懇女夫子修職郎泰寧縣丞陳經
瞻於學問工於詞章臨民廉惠遇事勤敏蚤年登庚戌
科第前任為吉水主簿今者適有天幸乃獲駿奔趨事
于卿月使星之末光天其或者將與之插羽翰而雲飛
脫泥塗而淵泳也某過不自量其老退之蹟輒恃與台
座前有同朝十五年之舊後有鄰邦二千石之託僭致
古人內舉不避親之懇上干筆端膚寸薦進之潤竊推
陳丞前任未滿而解官今任通理至來歲之冬乃成三

考妄意欲望台座特輟嘉泰三年上半年一京削以為
破白之舉名賢一唱諸臺必和倘辱未忘貧賤之交尚
篤金石之契驩然收卹仍乞來歲先賜照牒以慰老懷
信其有可望之期也仰惟此不報之恩泰華未為重渤
澥未為深豈惟陳丞得出門下實某得出門下也一寸
丹心天實臨之

與周丞相

某宿昔奏記且以虞公銘詩呈似一寸丹心端欲求指

畫之益非以微浮實之譽也乃上勤鈞翰之報至假以子長之褒且謂彪固而下不論聞命辟易汗背頰顏抑其偶當虞氏兄弟授簡之責永懷知己不報之恩舍己不承復誰諉者閔勉下筆所謂僮父學人作馨語兒童羅蓋效樽俎者仰睇彪固之門牆尚不敢充員於衙官筆吏之列而何暇子長之譏也乎非小人不肖之患子長不肯之患也汰哉丞相專以文許人乎至以子長許人乎此抑所云不爾則人不果獎者乎亟掩荀蹠之耳

未敢頓包胥之首也以榮以恩以媿以感示教當改為
神道碑即以登時剔改書丹矣至如書史誤以勅為戮
亦蒙是正而文病之尤者乃獨不揮匠石斲鼻之斤不
試鑿生洗腸之方豈姑摘其細以塞其求靳其妙而不
屑於教乎再作得一書答虞氏兄弟今納一本不寧唯
發仲尼之一莞猶未絕望於竄走之誨

與隆興張帥

某惶恐小稟女夫子修職郎新泰寧丞陳經贍於學問

工於詞章早年登庚戌科第前任為吉水簿今茲之官
沈舟之役塗出南浦欲膝行於橐兜戟燾之前茅以望
見台斗啖舌之末光仰惟一世之儒宗文師天下之鉅
人長德謂之進而不拒使得瞻仲尼之日見老子之龍
後進之士如天之福何以代此進越惶恐

與本路提舉張郎中

某惶恐小稟女夫子修職郎新泰寧丞陳經工於詞章
達於吏事早年中庚戌榜前任主吉水簿今茲之官汎

舟之役道出臨川仰慕一代名德之尊願瞻八使光華
之末敢望戶郎不拒連教謂進俾得以觀道德而聽教
誨不勝後進之榮曜

某惶恐再稟大兒南昌令長孺無能不才適有天幸乃
獲充負弩先驅之少吏願追隨掃門舍人而不得敢謂
台座攬轡之初小子奏記之日遽蒙灑駕士之墨刻陟
明之章先之以照移申之以奏牘舉詞袞榮恩意山莪
蓋下土鰥生欲求而未敢發者願措紳先生未見而先

收卹之老身榮懷固有藝極空臆推謝萬不一陳仰惟
原省

與本路提刑彭郎中

某惶恐仰恃天上知己二十年睦與雅敢鴈行避影進
越致迫切之懇大兒南昌令長孺無能不才適有天幸
乃獲充負弩之先驅被二星之末光全度盡護粗安庀
職竊丰食以活其孥未在西曹適滿之科荷載恩私盡
室同心也重念此兒自幼訓以一卷之書年十有八嘗

忝鄉薦技能淺陋竟以門子而進故隨在千官之底仰
惟台座一世之儒宗文師四海之鉅人長德餘論所及
枯枿再春敢望不靳筆端膚寸之潤誕真屬吏薦墨之
後或以奏課或以察廉或以陞陟或以十科或以所知
一字拜嘉皆踰華袞靡有細大莫非異恩第得在狄梁
公桃李之園某死不恨矣不避古人舉子之私上千膚
使拔士之牘一寸丹心不任悃欵頃嘗預稟矣

謝隆興張帥薦大兒

某惶恐大兒南昌令長孺無能不才適有天幸乃獲充
員牛馬之下走仰依台斗之末光玉振之所開明慶雲
之所覆露受容受察成始成終此惠已萬萬不貲矣敢
謂蒙國士之知度越百輩特灑薦士之墨刻發陟之章
孝友問學慈祥公勤顧小子未能於一焉拜舉詞難并
之四者矜其榮則華袞未緡較其恩則岱宗猶輕父子
懷仁糜捐莫報泚筆抒謝未究萬分仰惟台察

答趙戶送糟蟹回送黃雀并黃雀肝心醬

糟立解系久矣寄絕交之書詩人審言惠然送解顏之
味酌淥鄜而延問吐黃中而載欣箸以籌之瓶之罄矣
投桃報李媿瓊英玉案之兩無披絲多脂與心腹頭顱
而俱往薄言藉手不稱所蒙伏惟原宥

送周丞相烝蟹

某惶恐彭蠡郭索二十輩用四明法烝之以獻極知戒
殺故不敢生致免使校人畜之池亦不須送與江夏黃
祖也一笑既微且瀆不勝主臣

答雷運使

某伏以即辰凜秋暑退顥氣高寒恭惟都運煥章吏部
玉節天倚霜臺風飛羣黎載歌高厚咸若台候動止萬
福某漁釣一壑過者弗顧而霄漢繡衣軫一日雅遣行
李墮素書重幣以將其意名酒以接其驩誨之養生則
有隱居所注之編被以仁風則有晉人所揚之扇休之
燠之恩斯勤斯此殆執事將挽回古人之光芒以甄治
末造之澆漓而為是舉也不然反躬自視無以堪之世

俗感藏抒謝之語乃無一二可以藉手報嘉惠也光通
之侍未知曷日詩不云乎四方既平王曰遄歸又不云
乎萬有千歲眉壽無有害敬賦二詩以頌馬仰惟財幸
某竊惟則行則藏聖賢之高致有光有晦古今之盛節
歷選昭代時則有若都運煥章吏部經世之學遐有淵
源華國之文絢於藻火是故立之春風玉筍之班而不
為泰分之帥閫使輶之勤而不為淹建之頻年卷而懷
之退藏於道林嶽麓湖山之幽深追逐乎紫巖南軒名

德之芬香其處也濛濛如隱山之玉草木被其光暉其
出也垂垂如出岫之雲海宇徯其膏潤自西徂東持京
兆扶風之節復自北而南為西山東湖之游往來容與
皆裕如也此其中必有大過人者而世何足以知之哉
天之祐宋為之生賢必不為江右一道計昭昭矣退之
云胡不均宏執事樞今日此責將有在矣金馬碧鷄之
訪豺狼狐狸之問未敢以為門下賀

某惶恐進越再拜敬問金堂玉室之宅安期羨門之媿

即日恭惟中外尊稗受社山則某老矣無能為役抑取履結襪尚堪指縱某惶恐敬致賤懇大兒長孺無尺寸長適有天幸得充負弩之下走不勝大願願老先生薰以道德之馥飲以仁義之膏燾之以仲尼上律之天振之以北海薦士之墨使得為門下桃李廐中病顛實如天之福闔族之榮也一寸丹心翼翼悃悃

答全州知府陳祕書

某伏以凜秋暑退風露高潔即日恭惟判府祕書契丈

作藩政成民頌豈弟天棊忠貞台候動止萬福某老病
餘生棄官十年懸車三載雖未先朝露而自絕於斯世
久矣姓名不徹於朝貴書紙不抵於故舊如契丈之賢
而又有四十年與游之雅而亦不敢以一字相聞雲泥
相望車笠相遼其勢則然耳而風誼拔俗意氣邁倫不
遠千里遣一介行李墮雲錦之書訪生死於寂寞之濱
篤久要於平生之言此非今人之事古人之事也顧施
之於獨冷之閒人則所謂賢者過之者歟抒謝有陳萬

此寧足出處殊轍何從晤對鄉若太息願言乃玉在躬
以棟吾道即歸視草

某惶恐再拜敬問契家台媿即日恭惟尊稚受社山則
有委不外伏辱四幣二蕉斑箔非環堵之所宜有者拜
嘉珍感之至

答虞制叅

某伏以維孟之冬新寒告至恭惟思館制叅直閣燕居
潭府德名彌高天棊忠賢台候動止萬福某棄官十載

謝事三年老病推墮幸安田里慶雲之蔭景星之光實
衣被之揆厥所元感幸萬萬惟東序之金鍾大鏞西望
邈在天半安得小叩春容之聲以啟謏聞敢請謹細馮
戒羞服即膺一札十行之詔徑歸三事大夫之班

某伏自壬辰之秋雍國老先生台鼎拜孤保三諭蜀
父老之日面請鈞旨一見東閣之行馬行瞻琪樹而聆
玉振乃知傳鯉庭獨立之訓贊揆路奮熙之功自有人
也竊喜竊歎此生端不虛矣回首舊事便三十年人生

幾何良可太息。楚人既歸林下，而直閣抱負經世致主之業，潛稱韞積，自玩其光，不屑小出，而一施之使朝家不獲蒼舒，庭堅世濟之用，天下不睹。韋賢玄成相業之繼，獨非缺歟。遠辱雲錦之書，嘗草草敘報。是時臂疾舊病，偶作令女壻陳丞代執管城。至今震惕，開州人再至，乃能具短書以謝。伯仲長牋之辱，老先生銘詩併以呈，似茲不重陳。

某惶恐再拜敬問。恩閣玉嫵，即日冬寒，恭惟尊尊幼幼。

受祉山則有委不外蒙寄贈紅紫素羅三十匹下拜珍
感之至竊羅木錦各二匹聊伴空函匪報也兒輩辱問
勞長孺次公幼輿皆之官未及奏記以謝先生長者之
賜也

答虞知府

某伏以良月有俶氣露高寒即日恭惟恩舒判府直閣
身作長城臥護國西威惠用章天人咸贊台候動止萬
福某犬馬之齒今七十有五矣已迫夕曛未先朝露微

我故人燭之以末光何以逮此蜀月楚星相望各天一
方安得對床聽雨握手論文以寬此心之鬱陶願言金
王大業棟幹皇家即奉綠綈遂騫紫禁

某伏自辛亥之春東來紫氣照臨鍾山石城之間初得
瞻北斗之碧梧鸞鵠望東山之玉樹芝蘭蓋雍國老先
生之典刑文獻盡在曾矣盛德有後老身定交自賀兩
得之也語離一星晝思夜夢曷嘗不在鉅鹿下某棄官
歸老山間乃以壬子之秋也三請還笏始危得之寒灰

枯草過者掉臂伯仲間尚記憶老門生耶雲錦之書珠
王之唾訪問生死慰存寒酸詞旨劬愉意氣傾俗老病
餘生抵掌頓足覺生意頓回霜毛再玄也惟經世之學
濟美之才小淹外庸日竚光顯如范氏之堯夫呂氏之
晦叔此所謂於伯仲者老先生碑文已付便了也短書
以謝長歲之辱茲不重出云

某惶恐再拜敬問恩閔玉媿即日冬寒恭惟尊尊幼幼
受祉山則有委不外蒙寄貺紅素羅十有四匹太史

平治迹老先生制集下拜珍藏之至建本詩集一部木
錦一端聊伴空函匪報也

答湖北唐憲

某伏以即辰良月應期初寒戒候恭惟提刑太中尊契
文體上好生作民司命霜凜百吏春熙羣黎天人孚休
台候動止萬福契家玉椀受祉無艾某老病餘生死灰
不然貴者所棄舊者所忘也今茲遠蒙一介行李墮以
雲錦之書勞苦酸寒訪問生死此古人盛德之事非今

世末造之有者而又寵寄葛洪岫嶽之塵罔非玉床箭
鏃之英虹氣貫巖寶光浮鼎老者得此隱居扶衰却老
之劑仙人長生不死之珍惜未能死籍之可落猶庶幾
臞骨之再腴霜鬢之又玄也九頓以謝嘉惠累百言而
未宣寫耳小兒幼與孺子不足進於先生長者之門仰
辱招致之幕下自媿素餐勺返賤職而挽留不置恩禮
益篤老懷感激何有終窮出處異轍安得再望見青天
白日之清明願言愛重盛德大業即還雞翹豹尾之班

答彭侍郎

某伏以即辰雲葉護霜風刀剪水恭惟觀使待制侍郎
尊契丈淵兮萬物之宗游乎九垓之上天人咸若台候
動止萬福某老病之身已迫夕曛未先朝露芒寒旁燭
君之餘也極知孤搢逸韻高蹈事外闔扉以謝褫襪下
帷而對聖賢其名雖可得聞而其人不可得而見曲肱
飲水其樂也天所謂豈不實辛苦所思非饑寒不賴固
窮節百世當誰傳者耶我欲從之慨其室則邇也奉教

告灑然便對面豁然頓失心疾吃吃王秀才定不凡耳
已約渠惠顧當掃廳作一日談也諸封胡孰仕孰居皆
未及共戒語辱諷及兒輩皆景升兒子耳長者記憶以
榮以感未見願言珍重以棟斯文

答周監丞

某伏以即辰滕異胥命雲師來同恭惟致政提舉監丞
尊契文集芙蓉以為裳折若木以拂日天人盡護河嶽
給扶台候動止萬福某老病併至幽獨無侶有可樂者

其惟海內名勝平生故人一笑一談一觴一咏之間乎
千江隔萬山阻海內姑舍是也煙火相接雞犬相聞如
吾二人尚可諉曰疏乎哉一居白鷺之北一居青原之
東一葦可抗而其室則邇其人甚遠每一念之作惡數
日屬者奏記以寫我心以管城老矣罷於傳言赤鯁蠹
爾拙於寄聲心之精微欲徹於下執事何繇而徹也答
教之返真以玖報李也把翫未釋而漢水白錦又將一
封雲錦而至矣金聲玉振駭洞几杖華星秋月淵曜耳

目雙篚佳實千顆勻圓初疑得成紀黃龍之珠又似弄
王孫精金之丸驚喜自不敢寄專嚮偶有剝啄納謁者
自贊曰麴秀才也亟延上坐入坐觴而俎之欣然兩家
之難解灑然五斗之醒末矣占謝不敏末後一語惟曰
后皇之嘉橘與臣朔之桃李爭歲月論春秋云

答隆興張尚書

某謹已公牘以謝宮壺之賜洊奉真翰以示意氣之勤
且分似于湖先生之金書兼之有于家問之新刻至於

君明臣良之大字赴官臨風之留題大篇短章日光玉潔銀鈎鐵畫鳳翥鸞翔至寶滿前窮兒驟富降拜驚喜榮感萬斯某屬嘗奏記以謝大兒陞陟之章繼辱報教再有後日特刺之議得玉求劍敢萌此心一諾千金益深謝臆附見於此併祈台察

謝彭提刑薦南昌大兒

某恭承召節以趨介圭入覲亟奏記以賀屢復哦詩而餞行在野人既蒙報珺之賤而大兒復被薦鸚之表建

請擢用式勤臣工至於趨尚行能之著聞廉謹剛方之
獨立一之謂甚四者難并華衮不足以諭褒嘉之榮泰
獄不足以擬恩紀之重降拜銜哉謝詞周諄藏之中心
言之不足仰惟台慈賜之下燭

答李厚之知縣

先文竹林先生銘詩今驛送呈似別股事恐非不詭於
教者政犯鄂王府之大禁也故微其辭秦漢以前無塔
字韻書云浮圖也故易以塌亦傳以豫章懸榻之土風

望示報庶知不作石頭驛耳

答胡撫幹仲萬

某伏以即日近臘如春恭惟仲方撫幹學士鄉兄賓贊
戎聞天棊賢哲台候動止萬福某老病世所擲於道旁
者每蒙書札訪問生死公自為德吾何取也吾州又添
一趣班人未足為賀添一詩人真足為青原山賀矣龍
山十詩其味黯然而殊有后山風致使阿溫老兵知之
追恨當時坐上初無此客子耳嗟歎不足卷而復舒無

論餘子老夫亦當避路澹菴先生有孫季永亾友有子
此何可當也來歸通止豫為兆喜願言珍重臺家即以
鸞臺鳳閣貯之某悚息再拜敬問契家六珈九鳳月上
即日尊稚均祉餉乾桃及書箔佳甚降拜珍感兒曹荷
聲次公於前月二十五日秩滿計漸當歸尚未至也

答王晉輔

某伏以即日臘雪瑞歲恭惟晉輔上舍鄉友茹古之餘
神介尊候萬福某老病怯寒方願隱於臍以附似紅之

火乃蒙一介行李踏瑤瑤之迹詒書札以慰存之北果
白燭惠然朋來今夕濁醪真不孤寒須專春二字小俟
霽暉呵筆炙硯勉為作也願姑徐之近詩未欲拈出幸
察

答周監丞

某伏以若歲春秋益國已免其奏記贈我錦繡乘成復
講於多儀高詞清鏗笙鏞以間至寶琬琢金玉其相如
遺百末之蘭生侑以四老之搗葢淮泗入舟之白湖海

半殺之黃初疑食指之予欺頓使饑涎之泉湧銜最不
淺憂虞實多昔歲有北杏之盟功敢為於戎首今茲報
東門之役罪難逭於過先願夜豎於降幡勿後來之反
旆頓首哀籲抒心戰兢謹具劄子推謝仰惟台察

與周監丞

某伏以即辰平地尺雪允霽益寒恭惟致政提舉監丞
鄉丈飲瀼餐霞御風騎氣與造物而同遊與泰初而為
鄰三神交歸純嘏畢至台候動止萬福金臺玉堂之室

安期羨門之媿尊尊幼幼錫羨惟鈞其主臣敬以今茲
嗣歲將興端策遇泰陰外陽內小往大來是為君子道
長之辰不應五福類升之慶某生涯短褐行李長鑣願
隱於臍方縮焉而如蜩風其吹女覺煖然而似春敬上
三百一斗之觴仰祝千二百歲之壽謹具劄子陳賀恭
惟台察

某惶恐上覆吾州大勢不敢以茅柴觸網帥司襟帶堂
乘壺北果四套進越為壽蒙不麾去有萬其幸

慰秦宰

某恭聞諼堂太宜人壽考康強第祿無艾如魯僖之母
如戴勝之仙謂宜萬有千歲以享榮養不審何恙靡已
遽至大故聞訃悼心怛然恭惟愛孝如曾子純孝如考
叔驟罹哀疚何以堪之某老病待盡不克奔弔敬脩尺
疏以寫慰不腆奠儀布之別楮恭惟台察山川悠遠護
歸勤止願言裁哀以襄大事有委不外

答福帥張尚書

某伏以即辰梅雪饒歲柳風迎春恭惟判府安撫閣學

尚書尊契丈上節閩府移鎮蘇臺尺五近天一星朝斗

高厚送喜台候動止萬福某老與病偕胥會而集夕曛

無幾朝露未先天上故人憐之載之以及於斯也新除

家便頗似永叔覓蔡以近頽然上意有在當如君實赴

陳而過闕為費後賀而任安先書已重知不敏之忤矣

至於蘇司業之酒錢蔡君謨之玉鈔羅池之焦荔嘉惠

狎至拜辱不暇蝸牛之廬殆塞欲破感最思意南山之

竹不足寫此懷抱也禊堂新記示教古之兄弟繼重為
郡漢人詫為盛事之風謠特未睹祖孫先後迭建戟轟
於元戎之間耳路公德威之堂其子作之坡記之豈若
當家之坡自記之哉絕妙好辭敬無古人矣惡詩寄題
別楮錄去或可附記碑陰否未見君子願言珍重即登
鈞樞以世厥官

答贛州薛侍郎

某伏以即辰元夕將臨寒暄方戰恭惟判府侍郎尊契

丈臥護上流外撫百粵惠化威譽民頌天迪動止萬福

某老病餘生犬馬之齒今年七十有六矣棄官於壬子

之秋乞骸於丙辰之春聖恩特異玉音宣諭京丞相

云楊某官簿之年未及章却復上至己未之冬乃得其

衣冠長為農夫以沒世矣道旁老櫟過者不顧契丈不

我戮遺尚軫鸞臺樞府偕緣之雅若節春秋必修時事

移書以訪生死送酒以通慇懃顧僕無淵明之高公有

王公之賢公奚負於僕僕有愧於公耳鎖江主人能置

酒願渠且住莫終更但賦山谷之詩以抒銜戢之衷也
然天生大賢必使澤四海豈獨詘之外庸以私庇一莖
人乎前言戲之耳魯公平易近民之政王褒中和樂職
之詩類非俗吏所能為也下轉上聞歸巖廊秉鈞樞可
倚而竢惟貴珍大業以對越焉

某惶恐再拜敬僭易敬問契家台眷春寒恭惟尊尊幼
幼受祉山則益公與楚人同居一邦信如諭第楚麋山
鹿畏入州府已未之冬聞益公新樓落成即駕柴車一

往觀焉而州郡即招以公讌繼以臺餽是樂克從子教
子輿無戒心也因與益公相視而笑一揖徑歸雖却其
禮而得免焉自此每有相思折簡而已蒙問故及山間
有可委否

與新吉守劉伯協

某伏以即辰天氣澄穆風物閒美恭惟判府太中十乘
啟行五馬南來十里載歌三神送喜台候動止萬福某
敬齋宿奏記以逆執事之顏行仰惟財幸

某蓋嘗選近世人物之盛莫江西若者而江西人物之

盛又莫劉氏若者公是公非二先生偕以道鳴如古文

篇何必減原道如弟子所記何必減法言如西垣訓詞

何必減西京家傳正學之派心授斯文之脈不在執事

而誰在乎宜其根諸心形諸事敷諸政者類非俗吏之

所能為也所居民富所去見思邨江之毗至今手之舞

之吾州適有天幸上賜仁侯然州民則有其來何暮之

歌臺家必有無疾其驅之詔朝桎爭賢若為應之盍亦

一臨吾州俟報政然後寄徑乎郎宿卿月之躔橫鷺乎
簪筆持橐之地政未遲耳某也亦歌暮一人之數者輒
掇採民言哦為短啟以代乘韋之先或辱一覽而抵諸
地

某惶恐再拜進越敬問金堂玉室之宅安期羨門之媿
即辰恭惟尊尊幼幼茂介春祺某老病無用抑尚堪取
履結韉也

答王監簿

某伏以即辰春事強半寒氣未歸恭惟判府監簿契丈
至孝欽承几筵天棊思慕孝履支持萬福某老病餘生
牛衣僵臥長為農夫以沒世矣柴門寂寂無雀可羅而
况長者車轍乎敢圖荀龍薛鳳伯仲之間尚未遺忘先
相公翹材長缺之下客先之以一介輶車之書禮申之
以高軒玉季之親臨勞苦之緘彌勤加遺之儀益腆父
老驚怪泉石焜耀自顧一黃冠埜人莫測其所以得之
之繇第極其所以感之之切多言為謝萬此有足耶未

見君子願言念門戶重大之寄佩聖賢毀瘠之箴古有
韋平今有范呂皆父子鈞軸後先袞繡茲老夫所望於
門下者其勿與庶人之孝兢一槩之苦

某恭承介弟旆旂惠然照臨袖出伯氏尺素之書面授
相國言行之實付以紀述詭之以銘章自視淺陋之學
久矣就荒絕壑之思搞乎將落燭之武所謂少也猶不
如人今老矣無能為也已亦安能搞詞振藻以頌盛德
大業之萬分寫大勲鴻烈於千載使與皋伊先鞭周召


上風乎欲披襟則在蕪拙為己僭欲避席則在交情為
己疎三省九思絜日不決而介弟言之而不置迫之而
不釋閔勉授簡惴惴靡寧然尚有愚者千慮之一吾家
子雲不云乎水避碍則通諸海人避碍則通諸理昔六
一先生作范文正銘其間書文正與呂申公事極有典
則務從忠厚而范氏子弟不知六一之深旨往往不憚
此意已託介弟口傳於足下矣十月之交可遣便了來
取也

某惶恐再拜僭易敬問相門玉婁即日恭惟尊尊幼幼
茂介春祺令弟府判郎中縣直閣府判司今棟鄂八龍
孫枝九鳳受祉山則廬陵有委不外頒貺筆墨香茗蜀
圖石器北果腊麩拜賜珍感之至

誠齋集卷一百十

謹案卷一百九第六頁後三行小信機祥原本機
訛機据別本改

卷一百十第二頁前一行魯僖公之詩不云乎原
本僖訛禧据詩經注改



總校官庶吉士 臣 張能照

校對官庶吉士 臣 陳崇本

騰錄監生 臣 宣葆光

財團 佛人
陀教 育基
會 釋淨
空 敬
贈

